

四庫全書

集部

欽定四庫全書

集部

西村集卷一首

詳校官監察御史曹坦

中書臣劉源溥覆勘

覆校官中書臣康儀鈞

校對官學正臣常循

謄錄監生臣劉家瑛

欽定四庫全書

集部六

西村集

別集類五
明

提要

臣等謹案西村集八卷明史鑑撰案憲宗孝

宗時有兩史鑑其一長洲人宏治己未進士

見太學題名碑其一吳江人字明古號西村

隱居不仕即撰此集者也鑑留心經世之務

三原王恕巡撫江南時聞其名延見之訪以

時政鑑指陳利病怒深服其才以為可以當一面所著詩四卷文四卷嘉靖間其孫周裒而刊之以墓表及諸人哀挽之詩附於後周用盧襄各為之序其文究悉物情練達時勢多闕於國計民生而於吳中水利言之尤詳第五卷皆明初諸人列傳叙次簡明疑其欲為野史而未就也其詩亦落落無俗韻惟古詩不知古音所註叶韻多謬誤文中祭徐有貞文

及文後跋一篇以私恩之故為力辯奪門一

事未免曲筆耳案王士禎香祖筆記曰吳江

門人徐翰林電發

案電發乃檢
村徐釗之字

寄西村集二

十八卷其鄉前輩史鑑明古著也集中有曾

祖文質府君行狀

案文質乃
史彬之子

祇言洪武中縛

貪吏詣闕事無一語及靖難集是陳繼儒仲

醇選云云是鑑集本二十八卷尚非完帙然

今未見繼儒所選本故仍以此本著錄而附

載具卷帙之異同備考證焉乾隆四十一年

十一月恭校上

總纂官

臣紀昀

臣陸錫熊

臣孫士毅

總校官

臣

陸費

墀

欽定四庫全書

集部六

西村集總目

別集類五
明

卷首

徵聘詔

隱逸傳

墓表

薦疏

申文

挽詩

卷一

賦

辭

頌

樂府

歌行

卷二

五言古

七言古

雜言古

卷三

五言律

七言律

卷四

五言排律

古今圖書集成
總目
七言排律

五言絕句

六言絕句

七言絕句

聯句

詩餘

卷五

書

尺牘

序

卷六

跋

考

議

贊

銘

對

相喻

字詞

啟

傳

志

卷七

記

墓表

墓碣

墓版文

誄

卷八

墓誌銘

行狀

祭文

西村集原序

莊周有言曰刻意尚行離世異俗高論怨誹為亢而已矣此山谷之士非世之人枯槁赴淵者之所好也語大功立大名禮君臣正上下為治而已矣此朝廷之士尊主強國致功并兼者之所好也夫仁義忠信以為學出則朝廷處則山谷人徒以為為亢也以為為治也而不知亢之未始不為治治之未始不為亢也故曰夫人幼而學之壯而欲行之行則君子欲之然能必其行乎哉

欲之而不可得則其學猶是也是故亢而不為倍治而不為矜則固世之所謂通儒者已西村先生自少好學於書無所不讀卓然舉大義不掇拾以為文辭而尤攻於史學於古今治亂之端官府政事名物數紀縱橫上下指掌論說莫不有肯綮歸宿以為學者宜如是而不屑以求一試聲名隱然起東南成化中三原王公巡撫江南以百姓之利病坐先生而問焉則歷歷語所以退復疏其事以道諸所宜更置公嘆曰子之才可當一面

乃今得先生所著述自詩歌文辭之外其與旬宣大臣
臺部諸使郡縣長吏往復論白及於政事者居其三之
一馬莫不適當變盡利害里閭韋布之所推遜而無有
選擇縉紳大夫之所以嚮用致理而不能舍去者皆是
也則所謂通儒者非先生歟吾吳中經生學士講求時
務水利莫先馬決塞變遷大要委諸海而已殆難按迹
而求復其舊也職方禹貢以來互為援据夫人而能之
舉而加諸水則悖矣不然則又更於茲土者大發在官

之蓋藏而以畚鍤從事壞廬舍弊腴掘地數十里引
旁流內其中而曰水去矣明年不幸而恒雨曾不能損
水之分寸其如浮而不實費而無功何哉至讀先生論
水利書首以謹隄防其大法有司者使田者因地勢豫
為防以擬水於是立之表以程其功課之藝以益其厚
貸之粟以傅其力夫民水也大為之坊民猶踰之況不
為之坊乎裕民成賦之道未有能行之者其有用之學
可以畫一而論也余生也晚不獲操几杖以從讀其書

而每有感焉先生既歿其冢孫進士臣裒其稿為集余曰是集也約而達勤而節謀而有徵不獨論水利若是矣可以傳也余所嘗欲見先生所著禮纂若干卷尚不在集中先生史氏諱鑑字明古吳江人學者稱西村先生吳文定公表其墓家世行實具可考也周用撰

欽定四庫全書

西村集卷首

徵聘詔

成化十六年八月

朕承丕緒用人圖治亦有年矣永惟勞於求賢然後成
無為之治樂於忘勢乃能致難進之英聞爾處士沈周
史鑑沉酣經史博洽古今蘊經緯之遠猷抱君民之宏
畧顧乃遯跡邱園不求聞達朕眷懷高誼思訪嘉謨茲
特遣使徵爾赴用隱期同德出宜彙征以副朕翹企之

意

隱逸傳

載吳江縣志

史鑑字明古邑黃溪人學士仲彬之曾孫也鑑年十二
三天才敏妙語即驚人守祖訓不願仕進隱居著書吉
凶之禮動遵古法論事慷慨人莫能屈錢穀水利無不
周知世居穆溪擅園林之勝客來訪者陳彝鼎圖書古
色照耀不減顧瑛玉山草堂喜交遊持信義遊其門者
不絕性尤直諒有過必面規之成化中王恕巡撫江南

聞其名延禮之諮以政務鑑接席抗論未嘗及私恕深
器重焉吳文定公寬李太僕應禎沈布衣周皆交契倡
和甚富晚歲舉修憲廟實錄不行弘治丙辰卒年六十
三鑑於書無所不通尤長史學文章雄深古雅卓然成
家五言詩力追晉魏所著有西村集西村雜言小雅堂
日抄禮疑禮纂凡若干卷時黎里尹寬平望曹字練塘
凌震並敦學行與鑑為詩酒交成弘間號四大布衣

墓表

會狀元東閣大學士
兼禮部尚書謚文定
吳寬
長洲

吳江穆溪之上有隱士曰史明古其為人足跡不出百里之外然江湖間人知其名至於郡縣大夫亦皆禮下之而予取以為友蓋四十年於此矣其志正而直其言確而厲其所為無弗依於禮者當其壯時患閭里之人以巫覡惑衆上書縣中欲盡除之曰此皆不容於先王之世者不除則風俗不正禮教何由而行耶與人論事辯說超踔坐客莫能屈至有所感奮詞氣益峻雖達官貴人衝突不顧見依違徇情者心輒鄙之其治家辨內

外定上下嚴若官府然凡吉凶之事悉違世俗而行必
倣於古知禮者取之其學於書無所不讀而尤熟於史
論千載事歷歷如見而剖斷必公益有宋劉道原之精
至於時事人言得於聞見往往筆之成編則有洪容齋
之博焉若其才如錢穀水利之類皆知其故使得郡縣
而治之恢恢乎無難者為文章紀事有法醇雅如漢人
語詩則不屑為近體興至吟聲咿咿冥搜苦索欲追魏
晉而及之家居甚勝水竹幽茂亭館相通如入顧辟疆

之園客至陳三代秦漢器物及唐宋以來書畫名品相
與鑒賞好著古衣冠曳履揮麈望之者以為列仙之儒
也間與親友吳鐵峯數人扁舟往來月為雅集以觴詠
相娛樂又嘗與劉僉憲沈石田諸公遊武林經月忘返
所至為文記之曰此未愜吾志也會當絕大江北遊中
原覽岱華涉河濟循王屋廬阜而歸其思致之高如此
晚歲益務清曠室無姬侍築小雅之堂方牀曲几宴坐
其中或累月不至城郭至則止宿僧舍而已前二年予

家居一日忽冒暑見過飲水數椀而去又二旬而疾作
家人進藥俾持去曰吾治棺待盡久矣且吾年六十三
又夭耶竟卒弘治丙辰六月庚子也明古狀貌竒偉鬚
髯奮張平生喜交遊惟其持信義四方之士過其門者
不絕於所厚者有過尤好面折故人尤以直諒稱之少
謁武功徐公公與談史即許其有識遂數從議論而識
益進今致仕三原王公巡撫江南時聞其名延見之詢
以政務尤許其才然未嘗言及私事公益重之且恨其

老而不用於世也其諱鑑初字未定後始字明古自號西村人稱西村先生曾祖彬祖晟父珩母凌氏繼母朱氏娶李氏子男二人曰永錫太學生曰永齡縣學生女一人適鄉貢進士吳瑩孫男四人曰曾同曾繼曾遇曾達曾同縣學生孫女二人曾孫男一人曰夢禎當明古卒之明年予與文溫州宗儒往哭之其二子哭拜即以墓文請予念失此良友方切悲傷而何文之能為耶顧有終不得已者乃卒之四年己未三月庚申葬於吳

縣西山之博士塢為表之曰嗚呼世有信古執禮如斯
人者乎世有博洽好學如斯人者乎有才之達論之正
如斯人者乎亦有剛直好義高曠絕俗如斯人者乎有
如斯人當觀其終達生順命能保其躬嗚呼明古庶無
愧乎其中

薦疏

欽差巡撫南直隸地方總理糧儲兵部尚書兼都察院
右都御史臣王恕謹奏為薦舉賢良以裨聖化以光盛

治事臣聞唐虞咨詢務存採納周文好士恒若渴飢用
能成雍和之化故臣子效忠不惟勤勞其身尤必多所
引薦以底績勩史魚不忘蘧瑗鮑叔請召夷吾自昔公
篤之慮類然也臣待罪南都咨訪遺逸竊見蘇州府吳
江縣儒生史鑑天資超縱藝才標植文采英暢議論條
貫慤有端緒耳聽目覽瞥見不遺墳典邱索竹素以來
無不淹誦遇所著述下筆不休義理由其手出精深博
敏沉雄藻繪詞賦可相如此肩書奏則嚴安徐樂不能

過也且烈亮有聞忠直成性雖周昌謇諤汲黯誠直以
今方古未見其差若其經國匡俗水利錢穀慮變圖難
抗力矯志必能輯寧邦夏宣靖四方適時宜緩急陳安
攘富強之計誠文武克允貞幹負荷之器也伏願拔擢
陛下臨軒親試其可畀以方面之重必能究盡事情行
且大濟武功益隆文治三年之任而不能大有益於時
政臣當受罔上之誅無所辭避伏惟陛下垂神亮察幸
甚幸甚不勝恐懼云云

鄉賢申文

蘇州府吳江縣

尹詹文光

為崇祀鄉賢闡幽德以激後進事

據儒學廩增附生員李炫梅禹錫錢乾沈瀚等呈稱沒世不忘君子盛德之效奉嘗有紀古人尚賢之方故經重法施於民之文令著歲列於祀之典此古今通例風化攸關者本邑已故徵君先生史鑑字明古號西村自詩書衍族本忠孝傳家事繼母以孝聞待諸昆以友著超然出塵世之表卓乎具古人之風博學無窮篤行不

倦年幾杖國非公事不至公門身有席珍擅儒名而廣
儒業志非鴻漸羽足為儀行不同人分甘於野治家有
訓別內外而辨上下處世不流立綱紀而布經綸冠婚
喪祭四端輯四禮以行古道衣冠宮室等制遵會典以
合時宜廣祭田以備春秋禮嚴宗族設義塾以淑子弟
教普親疎兩朝以賢良徵上書而固辭也一邑以巫覡
惑建言而盡除之內閣吳文定公寬篤以朋情取謨猷
而建調元之績巡撫王端毅公恕待以賓禮藉經畫以

成治水之功憲廟纂修覈而不鄙西村文集古而益深
左傳編禮經疑禮經纂明文約博古考功懋先儒運河
志水利議小雅日抄武林紀事司馬年譜文開後學輯
遠祖廢塚清隅府浮糧實三吳之高士誠一代之偉人
鄉黨稱揚口碑尚在縉紳傳述心法猶存借使不能著
行於前曷克流芳於後當時仰瞻山斗今日想見羹墻
舊業遺文動如存之感流風餘韻闕沒後之思驗此行
實之詳允協褒崇之典禮應申請送入鄉賢祠一體同

祀庶使德化薰蒸風聲感召足以彰顯微闡幽之意且
造移風易俗之端事關公典理合備由

登小雅堂哭故友西村史先生 吳寬

路繞黃家溪水長春風灑淚復登堂草荒求仲常來徑
塵滿元龍舊卧牀分手死生嗟契闊傷心聚散覺淒涼
高邱數尺棲神地碧樹爭凋不待霜

哭史西村先生 文林

百里乘舟淚不乾堂登小雅倍辛酸高臺月上人何在

金定四庫全書
卷首
曠世風流骨未寒，好古有心真自許。貽謀無地不為安，
偉哉尚覺聞雄辯。漫展遺文一再看。

登小雅堂哭西村史姻家先生 沈周

築臺高住似神仙，恰好堂成及已年。歌哭於斯人忽耳，
死生無度事茫然。青山底處尋藏史，白雪從今付絕絃。
此夜獨登惟見月，清光依舊石闌前。

哭西村回雪中過鶯脰湖有感再悼一章

不復見此叟，歸哉空雪湖。低雲接清淚，遠浪激長吁。骭

麟老博士崢嶸偉丈夫明廷虛購玉滄海實遺珠雄辯
長翻口衰痕未滿鬚斯人竟微疾我輩強孱軀一邑人
皆愕三年夢已殊妙篇留膾炙還與不亡俱

登小雅堂哭西村夫子

文璧

六十三年蓋代豪掀髯想見氣橫濤鄉閭總識衣冠古
流俗空驚論議高前輩似公何可少英雄終老亦云遭
淒涼小雅新堂上曾把文章勗我曹

登墓哭故友西村史先生

都穆

紙灰飛雪滿墳臺
知是家人拜掃回
交誼忘年吾敢望
東風吹淚濕青苔

卷首

西村集卷首

欽定四庫全書

西村集卷一

明 史鑑 撰

賦

望泮樓賦

為何中丞作

會稽名邦新昌望邑沃州前陳天姥左翼奕奕學宮多
士斯集猗歟先生世家其側其側伊何夏屋渠渠於寢
之西爰樓以居匠石掄材史皇畫圖因揆地之不足乃
借天之有餘重簷瀉注八窻洞虛外靡飾乎丹雘中惟

藏乎簡書至若風和日美冬溫夏涼天宇朗豁雲容斂

藏先生乃裁爵弁骨葱衡叶被純衣揄纁裳或登左城

或由右平叶唯意所適徘徊翱翔既徙倚以流睇復招

搖而永望偉宮墻之皮業囿泮水之汪洋左涵右奩前

疏後闕叶如月之弦如環之玦泓渟淵潛汨隱蕩滴白

虹之來流行青鳥之徵源發忽掀風而觸石舉灑雨而

跳沫叶其旁則有蘭杏棠楮叶樅桂楠檉璀璨葦滢掩

冉交柯其中則有蘋荇蘩蕪芹藻蘼蓀應風靡靡揜水

田田若夫禮殿東建講堂西抗紮石崇基疏峯列障憲
星宿而經營法陰陽而背向其為形也瓌譎豐隆其為
勢也睽眾宏壯飛梁搏負而蜿蟺刻楠參差而矯伉丹
青煒煌光彩曄曄蛟龍騰而夭矯禽鳥飛而翺翮靈異
竒怪莫可名狀又若廊廡對列黌舍類區直如矢棘張
如羽舒循循如接武纍纍如貫珠莫不俎豆茲設詩書
是儲或先賢之所從祀或弟子之所攸居乃有牋儒敷
教髦士窮經爰游爰息允脩允藏或處於室或造於堂

校藝肄業問疑啟蒙叶分刊節度剖析毫芒當春服之
既成時夜漏之未央詠歸兮其行濟濟絃誦兮其聲洋
洋是故月課其成歲獻其良巍科甲第後先相望器之
為瑚璉才之為棟梁任方隅者為岳牧贊政化者為公
卿叶罔不由此宮而出豈不為賢才之大方也哉若其
行告報節春秋筮從日戒羣寮叶命滌為酒宿賓為期
叶至日東方未明辰次於子大夫朝服其袂有移至於
廟門肅肅戾止博士相之竦此羣士視殺既畢概器斯

已乃馨黍稷亦饗羊豕山物具登澤鮮備有叶血腥上
同乎古初歆孰聿兼乎人鬼遂乃燿火舉牲體升簋簠
饌籩豆陳工祝致告佐食駿奔於是大夫即位庶士綴
行爵解具獻燔炙畢從叶馨香苾芬光景輝煌爾乃麾
旛舉升龍翔祝具擊軒縣鳴鐘鼓鏗鎗金石鏗鏘絲竹
繁而不亂匏土劇而不傷迨升歌之一出衆音比而低
昂是皆宣中和而感神人竅幽渺而調陰陽又若華冠
紛羽籥入行八風舞六佾或俯或仰或徐或疾奮袞翩

翻頓趾秩秩泛而不浮沉而不窒張而不縱翕而不抑
氣洽形和神暢志得於是神具醉止祝告利成叶祭之
明日尋繹於祊維道原之不已求神在之無方是知聖
朝之所以尊師重道豈徼一時之福報一世之功也至
若賓興之期蜡通之祀因民聚之時行鄉飲之禮或序
賓維賢或正位以齒欲使民尚德而敬長觀化而興起
於是主人謀賓介誓有司戒且肅敬甚卑拜辱於館拜
至於階叶賓席南向牖南是基兩階之上主阼介西有

降必從有洗必辭主人獻賓薦脯設俎叶齊肺興加啐
酒告旨乃酢乃酬百拜成禮獻介如之遂及衆賓衆賓
之長升者三人坐祭立飲肆席其西叶若夫位於堂下
亦辯薦而必均猗一人之舉解助主人而樂賢叶有遵
維公大夫實從公席三重位於賓東大夫再席主北西
容維升降與獻酬絜介賓之是同乃有樂正先升羣工
次入歌之三終比以二瑟依特磬以為聲吹笙和而應
律遂乃間歌雅什合樂風詩嘒大音之猶在美王化之

始基然後正歌備工告悉主人降司正陟奠解飲旅酬
畢徹俎脫屨揖讓就席爵行無算樂奏維欲叶樂湛無
荒醉止不失及夫禮既成賓辭出陔夏奏牘聲作叶應
偕鳴雅合節叶主人拜送以明有卒逮夫孟春之月合
射學宮祇用觀德亦以和容飲禮倡其始燕禮衍其終
其為職也則有賓而無介其為樂也則釋雅而歌風采
侯既彰照質攸設特磬徙東其翼捷業叶司射適堂袒
而遂決有司請射三耦維劉彊弓既設羽簇斯棘景如

星流聲如帛裂叶有旌負侯樹羽幢幢諾聲振之唱獲

奏功釋者報算委於鹿中用祈爾爵取飲於豐獻獲於

侯乃用折俎獲者負侯北面拜受叶初適右介終中亞

左叶遂當侯以三祭立既爵而俟後叶維大夫之與公

士亦拾發而為耦叶揖皆進以當物取乘矢而順羽爾

乃樂以騶虞應以懸鼓采蘋間之其終成五越三射之

既周辯受酬而旅語恍若子路執弓序點揚觶而相與

習於矍相之圃乃知先王之教所以習容儀知賢否叶

金少川集卷之三十一
卷一
可以文可以武非以之逸時而尚譽也曠千古而難兼
乃一樓而卑覩匪慈母之三遷由擇居之得所於是朝
之縉紳鄉之黃耆咸喟然而稱若出一口曰夫樓觀者
所以廣心目宣鬱滯暢精神覽風氣史不勝書文不勝
記然求如我望泮之飫道醉德漸仁浹義慕聖思賢育
才游藝是殆猶霄壤之殊固不可甲乙而第然而先生
憮然若驚瞿然若悸思其所未能不自以為至也客去
乃援琴而歌之歌曰日月光華兮不遠伊邇其來無終

兮其被亡已再歌曰明明在天兮人皆見之運行有常
兮匪獨我私樂此終我生兮又將何求

結微賦

送吳修撰
原博起復

繫青春之獻歲兮和氣周浹而流行白日照晰於上天
兮微風動物而發生惟美人離此故居兮將騰駕夫遠
道榜餘艖之長舟兮濟江湖之淼淼紛賓從以馳驚兮
咸出祖乎河之梁蒸蕙蘭以為穀兮精瓊瑤以為漿羗
升歌而比竽瑟兮音博衍以疏越獻羽觴而旅酬兮行

徘徊而未發睠回視夫舊鄉兮情鬱悵而內傷念王事
之靡監兮懲懷與安之敗名叶忽交手以前行兮曾不
能須臾處也望雲旗之委蛇兮順埃風而輕舉也經中
原之千里兮覩邑野之蕭條喟憂心其忉忉兮哀民病
之曷瘳叶凌呂梁之洪濤兮指天津以徑度日皇皇而
不暇息兮恐年歲之遲暮曼流日以遙睇兮偉皇都之
赫戲騰王氣於中天兮儼神明之所居叶旦將入覲於
六儀兮宿澡祓而致齊叶聞鸞聲之將將兮起視夜之

何其戴切雲之高冠兮帶長劍之陸離被夜光與明月
兮檻椒蘭以充幃當闕門之未啟兮聊假寐以潛靖魂
營營而靡適兮豈斯須之忘乎敬忽雞人之唱曉兮命
天閣其啟闕爛煌煌之庭燎兮紛炫耀乎崇班風泠然
而轉爐香兮芳菲菲其滿殿奏中和之韶樂兮鳳翔鳴
於霄漢望重瞳而舞蹈兮折瑤枝以為獻亮君用之不
乏斯兮冀少伸其慕戀惟玉署之清華兮在人間而天
上備顧問而獻納兮掌絲綸之密命叶蓋將儲將相於

禁林兮豈辭藻之為優
遡紫霄而容與兮凌玉清以逍
遙叶啟北扉而鄉浴室兮紛召對以無時
總史筆之婉微兮發金匱以抽思
誕帝心之簡在兮秉化權其有日也
沛德音之浹行兮周四海而靡息叶也
勒金石而播聲詩兮又何古人之不可及叶也
嗟予生之賤且遠兮固幽獨而傷懷叶也
苟願言之不孤兮雖槁死山澤其何悲也
亂曰黃鵠一舉翔千里兮其羽可儀
洵且美兮罽羅高張莫我以兮
下視鶉鷄栖棘枳兮其鳴咬咬其

飛靡靡兮顧瞻徘徊不知所止兮高下異勢固其所兮
匪不爾慕不可易處兮翩翩獨征無疇與兮庶幾永日
以安所受叶兮

惜愍賦

送莫景周赴
新昌訓導

秋風蕭條夕起兮白雲變而為霜原野寂寥無色兮草
木為之不芳嗟夫君去國而遠逝兮將往遵夫行路蹇
徘徊而不進兮步十舉其九顧望皇居而不見兮涕浪
浪以霑衣情侘傺而莫釋兮何須臾能忘之繫願忠而

慕義兮冀少伸其微志胡壅遏而不通兮曾不能以一
試彼蕙纒與蘭珮兮宜日切乎君身忽棄捐於山谷兮
豈將惠夫南之人視江湖之浩浩兮紛日夜而東流駐
駟馬於山輦兮乘舡船而下浮去故鄉之日遠兮路險
難而多牾濟錢塘而上稽山兮踞陳辭於神禹慨聖功
之無間兮民日用而至今仰昭回於上天兮儼光華之
照臨入浦江以南徂兮眷新昌之所治俗儉嗇以憂勤
兮乃風氣之所會山從龍以多雲兮晝冥冥其若雨林

幽深以行迷兮疑非人之所處虎豹穴處而咆哮兮猿
狖跳梁而嘯啼溪谷嶄巖而險阻兮草莽委被而萋迷
苟衆芳之不乏君用兮雖僻遠其何悔也羗好修以為
常兮矢初心之靡改也昔賈誼以才見嫉兮卒遠竄於
長沙柔何切終馬宣室之召對兮語前席而忘罷叶苟其
言之見用兮身不必在乎君側繫貴寵之與賤疏兮諒
由命之所出惟定心而廣志兮寧時俗之能從撝茲媚
以潤身兮豈將愁苦而終窮亂曰鳳凰集於高崗兮世

金史卷之三十一
卷一
已見其文章固非時俗之所好兮然共以為嘉祥托靈
風而上浮兮俾翱翔於帝鄉

甘泉賦

為吳汝
琇作

維皇天之流澤兮降靈津於厚地隨洪纖以成形兮滋
萬物以攸利阨於川而不為隘兮放於海而不為泰叶
浮元氣之淋漓兮長如斯而靡竭叶猗高原之汨汨兮
實異名而同類孕湛露之餘潤兮毓圓魄之凝精發脉
於至密兮而演派於無垠挹之斯不虧兮貯之斯不盈

超濁世之埃滓兮沁沆瀣之華英彼美人之嘉遯兮心澹泊而無所樂獨於斯之鍾情兮將夙夜以從吾好朝酌之以自甘兮暮飲之而屬厭彼芻豢之羶腥兮固無與乎草藪羗蔬食之與太羹兮紛胥是以為具庶幾日周旋兮以永夫終饗餐至和而咽真液兮濯臟腑而澡精神除粗穢而沃內熱兮思飄飄之上滄乎浮雲眇六合之密邇兮舉集於吾之目前託餘音於商歌兮儼金石之相宣歌曰泉之涘穹然可以栖吾之宇兮泉之流

金少...
卷一
悠然可以漑吾之黼兮泉之味泊然可以潔吾之茹兮
終吾生而靡他保兮願見君子而譽處

辭

桂宮辭

桂樹連蜷兮巖之幽有美一人兮於焉逍遙叶履巘巖

兮日延佇嗟所思兮在中路審何為兮不來恐年歲兮

遲暮採芳馨兮遺之遠莫致兮愁予去聲結桂枝兮為房

芳菲菲兮滿裳矯厥美兮自媚日欣欣兮樂康

雲松辭

壽詰封禮
部楊景芳

長松兮蒼蒼白雲兮英英叶上有女蘿兮下有苓駕飛
龍兮行四方蹇夫君兮惟顧懷叶日徜徉兮澹忘歸結
松枝兮為蓋攬雲氣兮為衣雲衣飄飄兮儵輕舉仙之
人兮紛紛而從女朝蒼梧兮夕縣圃君長生兮樂無苦
又重之兮有美子松宜棟梁兮雲宜雨潤乾枯兮庇寒
暑

頌

慈竹頌

壽王節婦

維坤德厚竹挺生兮貫歷四時常青兮中虛外直類
秉志兮色潤而貞不嫵媚兮材為世用調律呂兮和樂
定時萬事舉兮翠實羅生鳳斯集兮五色離褻映朝日
兮恒幹亭亭執峻節兮愈老而堅傲霜雪兮抑之不撓
撼不躡兮允矣碩人可比德兮挺立不遷如勁特兮娟
靜潔清其儀不忒兮秉節好修遇變靡易兮其萌夭夭
耿有光兮為民之則爛文章兮令名令望日孔昌兮千

百其世未可量兮

樂府

褚公廟樂章

天蒼蒼兮九重神皇皇兮雲中乘飛龍兮翱翔覽宇宙
兮無窮臨睨舊鄉兮顧懷載雲旗兮下來飄風屯兮零
雨慰我民兮夙思民思兮焉極意恍惚兮有奕鼓鐘將
兮和鳴神既留兮為民飲食

迎神

庭燎有輝兮夜向明雲掩冉兮光晶熒神其醉飽兮欲

旋溘埃風兮上征駕雲車兮駟玉虬聳長劍兮揮公矛
斬夔魑兮屠蚩尤廓妖氛兮無外匪獨賁兮此州

送神

烏啼曲

慈烏夜夜啼啼我門前樹今年復明年生兒不飛去返
哺鳴相呼旁人莫驚起兒大還生雛烏兒尾畢逋

敬宗操

并引

敬宗美凌孝子也孝子能愛敬其嫡有加於生可
謂知所重矣嗟乎世之人私其所出而薄其嫡者

比比而是甚至貴為大夫士而於贈送之典有亂
其分者不知蔑其父而誣其宗廟自陷於非禮聞
孝子之風可以媿矣余故假其詞而寓諸音授操
縵者弦而歌之庶觀民風者有所擇采焉

少生我兮兒寧不知兒奉嫡兮將尊父為父為尊兮宗
廟斯敬兒於所生兮豈忍忘之嗚呼天高以尊兮地順
以卑兒心孔悲兮知者其誰

圖瑩致思四首

并引

林侍御誠莆田人也生十八日喪其父進士公輝
七齡喪其祖兵部郎英侍御貴以言忤時相歸日
畚土樹木墳成迨復用以諸隴之不能朝夕斯也
乃繪為圖詩之以洩其哀思云

寶澗操

兵部初葬穀城山既遷寶澗之西題曰寶澗西原

羣山巖從孕厥靈兮維石林林粲列星兮水泉交流樹
羅生兮匪無穀城可以藏兮不如此之安且臧兮公孫
獨賢行四方兮誰捍牧采無毀傷兮瞻望弗及涕泗滂

兮

象山操

進士之墓在象峯
題曰象峯東麓

瞻彼象峯兮維麓陂陀考昔早亡兮托體其阿兒焚黃
兮親知不知兒樹木兮日益以多嗚呼謂天匪高兮謂
地不那生不父識兮悲其奈何

鳳山操

進士之配封孺人吳氏
葬地也題曰鳳山北隴

高哉鳳凰山下有壽母墳孤兒日種樹歲久皆成林林
成使墳好利爾非兒心一朝受王命舍之登要津慈烏

飛來樹上栖啞啞反哺鳴聲悲爾烏有母伸其私我獨
行役未能歸側身南望涕漣漣

塗嶺操

侍御壽藏題
曰塗嶺南窩

塗嶺崔嵬深谷逶迤營彼中藏厥土攸宜象峯東委鳳
山北峙去父母居不遠伊邇瑕邱云樂遠瑗請前子高
復事擇不食馬君子之與惟中道處觀於九原吾其歸

汝

冠禮圖

為鄴人
余懷明

大賓初戾止贊者相其儀主人迎入門揖讓共升階叶
鋪筵在東序櫛纚為施笄降升授緇布進客前致辭適
房服玄端爵鞞亦從加叶幼志既云棄成德斯慎之孝
友其時格多福由茲基努力永勿替萬壽以為期

始加

出房欲何之南面示容體大賓降西階盥卒升正纚皮
弁親執之乃申再加禮爾德苟能慎威儀斯濟濟眉壽
萬斯年受祉茲其始素積既陽陽素鞞還委委服之永
無斃夙夜斯敬止

再加

三加禮彌尊欲使諭其志爵弁高峩峩純衣美而袞纁
裳遵古法韎韐非新制兄弟咸具來孝友期無替厥德
斯有成禮儀茲既備甘醴受而祭孔嘉昭爾字黃耇典

台背俾爾耆而艾

叶

天休永保之克昌惟世世

三加

歌行

靈芝歌

靈芝生

叶

粲若英

叶

來百福世其昌

靈芝生光且奕慶斯鍾象乃德

靈芝生叶銅池中叶和致祥壽無疆

靈芝生氣之粹配慶雲象華蓋叶

靈芝生受天祐祐維何錫爾祚

靈芝生叶何輪困子孫兮宜振振

豐城篇

喜汝其
通秋捷

豐城孕靈異古劍淪獄中高牖以為域厚土以為封匪
無用世意守在得其從光芒不可揜精氣化為虹融然
靜夜中上貫牛女宮遂令博物人候望訊竒蹤啟鑿發

深銅拂拭去塵蒙
蕭蕭白鷗尾濯濯青芙蓉
所遇無堅物蛟螭莫嬰鋒
時時吼匣中恍若鳴雙龍
尚方信多珍神物不世逢
行當獻天子持之授元戎
時興薄伐師一掃烟塵空
塞徼靖無塵邊民業耕農
坐銷冗食衆良由用劍功

去婦怨

少婦顏如花嫁來十五六
辛勤養姑嫜紡績事衣服
一朝顏色衰鏡中非舊時
夫婿本輕薄恩愛變成疑
大姑

猶似可小姑讒殺我去我不敢啼啼時當及禍回頭告
故夫妻去看妾雖寄語後來人善事大小姑

孀妾詞

妾家住鴛湖花容映雪膚深閨不能閉一朝嫁金夫金
夫內寵非一人衆中最愛惟妾身並馬章臺光照路同
舟蘭浦影搖春光可惜不長久昨日紅顏今白首金
夫一夕夢不醒零落殘粧猶在手雲情雨性難自持畫
眉再受他人綏嬌兒幼女棄若遺望母嗷嗷泣路岐泣

路歧母不來叶行人見之相為悲地下金夫知不知

靜女篇贈張靖之

靜女姝且好采香谿水邊容顏若華月流光正嬋娟黃
金為步搖明珠間琅玕霧縠翳方空長袖拂翩翩美目
騰光彩靨輔宜笑嗚凌波動微步旋轉何便嬛令色天
下稀遂為君所憐選擇升椒除燕婉侍君前雞鳴戒盈
朝辭輦願推賢君心重賢淑寵倖冠三千逍遙赤墀畔
游戲青蒲端衆女嫉蛾眉善淫生巧言遂令絕世姿擯

棄不復延寂寞閉長門蹉跎過盛年君門深九重虎豹
衛嚴闕望幸固已絕求通良獨難彈琴和悲歌淚下空
沈瀾薄命古來有君恩故如天

一鶴鳥篇

鶴生雛在祠宇雄飛為求食雌鳴相煦嫗羣雛日云長
離離半生羽客子升屋危攀巢探雛去 鶴亡雛鳴聲
悲飛上復飛下似訴監州知監州民父母仁民當見推
聞聲為咨詢知是宥子為立命答宥子送雛還故栖

鶴還雛飛且驚引領復呼羣旋繞監州庭上感監州恩
下全父子情監州有惠政外嚴中則仁遇物且能然臨
民斯盡心誅彼暴惡徒全此虫虫氓豈獨鶴還雛洋洋
多頌聲

仙人篇

仙人何翩翩來自芙蓉城蒼龍駕羽蓋白鹿夾雲駟飄
搖紫霞裾旖旎彩霓旌揚言語世人吾道可長生鼎中
養鉛汞火候日抽增龍虎得交媾丹成化黃金叶服之

生羽翼輕舉昇天行歷覽周八極飛行不暫停赤松與
王喬揖手來相迎徘徊雲路側翱翔朝太清上帝休北
牖羣仙集南楹楹間兩玉女雲璈襍鸞笙飲爾流霞杯
侑爾步虛聲不生亦不滅倏爾數千齡俯首觀下世塵
霧杳冥冥我聞仙人語太息淚沾纓秦皇與漢武學仙
盡無成輶輳鮑魚腥茂陵松栢青此時仙人在胡不救
其傾仙人言雖好掩耳不能聽

舊巢燕

舊巢燕尾涎涎秋去如別離春來復留戀前年主人賓
客多滿堂笑語沸笙歌百鳥盡入籠中養猶引虞人日
網羅今年主人忽貧賤客散鳥飛門戶變燕兮猶向舊
巢歸依舊年年一相見一相見空復悲此生相守期不
移不學百鳥被人籠養在華屋華屋自來多反覆一朝
食盡別家行往來徒為人所輕舊巢燕葺爾巢育爾雛
爾雛大來為我徒翟公門下舊遊客不及爾心終不渝

狐綏綏

并引

中使與妖人相為表裏毒流海內言之可為於邑
司馬三原王公奮不顧身抗疏上陳有犯無隱卒
能感悟君心誅戮凶黨以謝天下斯正孟軻氏所
謂一正君而國定者也因託物引喻以頌豐功盛
德之萬一云

狐綏綏鬼為侶夜嘯叢祠作神語戲舞跳梁從社鼠雲
凝月黑天冥冥尾搖陰火光如炬興妖作孽天不知指
顧瀲灩雷風隨社公土伯望塵拜白望橫行九州界萬

民皇皇訛且驚市肆晝閉空其城羣巫四出假神命搜
括逮捕何縱橫巫言神君去天咫尺民命由來主張是神
令下界來求珍敢有不共隨殛死明月珠夜光璧瑪瑙
之盤大逾尺婆律旃檀蘇合香珊瑚琅玕亞姑石此物
何由在山澤巫傳神言許輸直厚佑高評動千萬破產
傾家責難塞黃龍大舶行迷津櫃帛囊金無紀極江南
真宰哀民窮封章上奏天皇帝天教六丁攝狐鼠貫以
大索囚鐵籠斷狐頭斫狐趾磔鼠之皮肆諸市妖巫殄

滅厲鬼亡四海清寧萬邦喜真宰之功一言耳回格天心正人紀

山中采菖蒲壽安晚老仙

山中采菖蒲澤中采雕胡雕胡持作飯菖蒲持作菹問

君將何為言就仙人居一解仙人居安在震澤東南隅門

前有長路青松間白榆舍後有清池蓮葉巢神龜叶二解

高樓臨水起縹緲隣太虛木蘭為軒檻桂樹為門樞黃

金為寶蓋八角垂流蘇三解仙人山澤癯為樂自愉愉長

身且高顴紅顏白鬚鬚潛光飲夕氣眺景含朝霞

叶四解

有子兩三人才名皆丈夫朝莫問平安濟濟庭中趨諸

孫八九人溫溫玉不如出門遠行遊所業在詩書經年

一來歸銀鞵照驪駒

五解

壽星何煌煌照我仙人居賀客

來滿途仙人舊懸弧請客坐堂上布地紅氍毹

六解

促令

辦中厨品物事事殊山珍間海錯肥羊和笋蒲玉壺湛

清酒金盤鱸鯉魚

七解

名娼出邯鄲窈窕世絕無頭上翠

琅玕耳懸明月珠紫綺為下裙紅羅為上襦上堂拊琴

瑟下堂吹笙竽清歌按妙舞行雲隨卷舒

八解

坐中黃眉

翁向前持一柸

叶

三千一洗髓九千一伐毛

叶

請看目

瞳子清光果有不

叶

金石未為固喬松真吾徒崑崙閭

風上與爾長嬉遊

叶九解

廣州督

廣州督行勿遲苗獠正猖獗攻城及湮池廣民授甲日
登陴將軍呼酒賞花枝廣民析骸還易子將軍停舟看
山水廣州督勿遲遲戕民命尸者誰

北風歌送徐時晦

北風淒厲兮凜盛寒之中人歲忽忽其欲暮兮鳥寂寂
而無聲繫美人之不留兮將問津而徂征傷予心之慙
慙兮滑予魂之營營望前旌而太息兮曾不能從之以
行惟德音之孔昭兮恒佩服於予身苟中心之靡他兮
雖在遠而日親

烈風七章憫吳孝子廷用

烈風無停柯凝霜變青草年命苦相催壽者何其少惜

哉延陵孫無奈徂謝蚤孤兒未能行寡妻年尚小含淒
教詩書灑淚相攜抱矢志期自持有如白日燄

白日出東北暮向西南流誰知貞烈名亦應宮掖求郡
縣苦見迫強命登行舟慟哭與兒訣相見永無由生當
長戚戚死當長悠悠

悠悠復戚戚哀怨無終極有詔屬藩王隨例之封國寂
寞掩長門彷徨思故域邱壠不復知孤兒長在憶夢中
或見之覺後那可得相離三千里安能來母側

母側兒不來叶 兒悲無已時升高望母居路遠莫見之
浮雲暗邦國遠樹含悲颺白日忽西昃景在桑榆期顧
瞻起長歎吞聲淚漣漣

漣漣竟何益誓將求四方崎嶇指東廣迢遞轉西江叶
行行異川陸冉冉變溫涼層巒翳雲日巨浸騰蛟龍叶
畏途良險艱十步九徬徨誰謂君門遠萬里終能通叶
陳情叩閣陸昧死干賢王

賢王任孝理下令許迎歸誰知病已革不絕僅如絲顚

天代以身封股持作糜張目忽能視言動如有知瀕死
得一見驚號更相持哀聲徹天地旁人亦酸悲

酸悲復嗚咽哀哉終隕絕本圖得生還豈料是死別啣
哀理歸柩水舟仍陸轍江湖多風濤谿谷深雨雪間關
幾千里終焉祔先穴山高亦有崩水深亦有竭孰知哀
慕心終天不可滅

桃莊行

桃莊西頭多古墓下有死人常不寤墓前松栢盡為薪

墓下牛羊時滿路牛羊下上牧豎歌古碑無字空峩峩
棺中白骨縈爛草殉瑤知入豪門多豪門豪門心未已
猶課僮奴日侵毀輦石取泥無厭時古墓為田新墓起
勸君為墓當益固願君莫學桃莊墓

畫馬歌

房星之精化為馬肉駿連錢滿天下世俗寧知驥與駑
善相方臯一何寡君看畫馬自有真能通相法方入神
驪黃牝牡不足辨天機內解斯其人騰驤飲鬪逐水草

筆端幻出龍駒島雄姿矯矯長風生逸氣稜稜飛電掃
老眼摩挲忽驚起便欲驅之涉長道君不見曹韓已往
不復生吳興死後無丹青天閑龍媒十萬匹誰能起之
圖爾形

秦淮歌送陳文振

停君金叵羅聽我秦淮歌長江西來幾千里沿回直入
臺城裏浮青蕩綠南北流至今猶號秦淮水秦淮之水
能容舟秦淮之上花滿樓美人捲簾垂玉鈎太白仙人

清夜遊酒酣乘月往石頭棹歌渡淮水倒披紫綺裘英
風撼五岳豪氣溢九州邇來四千四百九十五甲子無
人繼此移山倒海之風流水光依然月如故斷雲零落
令人愁豈無清歌與美酒與子碌碌誠堪羞我歌秦淮
歌送君秦淮去城西酒樓在何處主人今非舊孫楚且
須痛飲歌達曙達曙歌醉方寢笑壓吳姬股為枕滿身
糝糊覆宮錦明年我亦泛秦淮手解金龜就君飲

澈浦楊將軍歌

楊將軍才且武作鎮邊城勇貌虎海波瀟灑南風生日
夜登陴按樓艦揚兵耀武天欲傾驚雷破山震輦鼓震
輦鼓縣旆旌紀律肅步伍精止如山峙來如風行戰無
前陣攻無堅城倭夷遠竄海道平坐令四野無交兵黎
民久安堵不見寇盜驚揚將軍好士無與倫胡公老去
蕭生死康生羅之為幕賓倚馬作露布揮戈淨風塵謂
予好奇節論交握手意氣親平生慕魯連輕世肆志不
羞賤與貧射書直欲諭燕將蹈海不肯為秦臣方今三

金少府... 卷一
邊用師旅我將持書告當宁
佐君徂征固吾圉功成不
受茅土封笑指雲山是歸處

觀潮歌

雞聲喔喔天未明
大家盡說觀潮行
騎輿徒步相迢遞
袿服靚裝街市盈
江頭日高潮未生
秋風獵獵笳鼓鳴
美人狎坐臨前楹
嬌歌婉轉調鳴箏
須臾謹呼笑相指
一線遙從海門起
潮頭崛起高於城
萬雷齊轟駭人耳
排山倒海天欲傾
回波激射竒態生
兩陣合戰兵力勅

戈甲晃晃秋空明羣兒弄水夸巧捷擊旋感踏如浮萍
人言潮來信有時我言潮來不可期君不見胡兵營沙
人有待潮乎此時信何在徒勞日後來不休萬古莫洗
錢唐羞

紀遊歌別崔望宗丁公耀

憶昔辭家同作客千里遙遙事行役姑蘇臺下榜人歌
萬頃湖光浸空碧慧山隱隱雲欲連山靈謝客心茫然
吁嗟鴻漸不可作扣舷空賦招魂篇延陵祠前春草綠

再拜陳詞獻醞醖九原焉得使重生為振高風轉哀俗
犇牛闌下多飛濤打鼓發船奚憚勞樓臺晚映丹陽郭
卧聞笑語聲嗷嘈南徐山水鍾竒秀壓酒吳姬遠招袖
霍林寺裡杜鵑花不見妖紅更如舊酒酣走上江邊樓
樓名多景還多愁古來豪傑竟何在但見江海朝宗流
大江茫茫與天接三老開頭敢矜捷長風浩浩自天來
吹落寰瀛秋一葉金山屹立江之中水天浮出青芙蓉
絕頂浮圖絢金碧兩岸往往聞晨鐘中冷之泉冠今古

旋汲還歸鳳團煮碧雲零亂白花浮傾入詩腸浣塵土
維揚自古稱繁華陵遷谷變重谷嗟高駢樓廢今生草
煬帝池荒但聚蛙看花偶入蕃釐觀物態人情幾移換
當年仙種已無存尚有穹碑可尋按二十四橋春水平
紅亭圯毀赤闌傾鳳簫無聲玉人去惟見夜月依然明
海陵蕭索人家少城郭依微望中小五更茅店雞一聲
露冷烟濃遠山曉崇川乃在海東涯參差雉堞鳴悲笳
海山樓高切霄漢故鄉南望浮雲遮海上潮聲信朝夕

四海無人事禾麥遠浦風多海味鯉沙場雨少鹽花白
狼山巍巍高插天五點螺鬟凝紫烟東風多情野芳發
胭脂滿地遊人眠半山亭外春如酒愛聽啼鶯坐來久
行行更上青嵯峨白石無塵不須帚馬鞍之峯形與同
龜田幻出波濤中溝塹秩秩宛如甲乃知造化非人工
西上坭山幾千丈鐵杖還敲洞門響東看鞭迹劍山頭
俯仰令人動遐想海門水與天河通乾坤上下涵空濛
樓船采藥去不返蓬萊應在虛無中斯遊隨處得竒遇

記遊可惜無佳句
林間子規催我回
解維更泛南來路
南來喜到鶯湖西
湖亭小飲離思迷
越女含嬌唱楊柳
羅巾淚濕蛾眉低
沙頭酒乾玉壺側
黃鸝其奈臨風啼

金臺行送吳進士汝礪之京

送君松陵道遠上黃金臺
黃金之臺在幽薊
燕山易水相滌洞
燕昭栖栖本弱國
郭隗瑣瑣非雄才
時移運改真主出
廊增基構崇高
哉下瞰中原撫五岳
上摩北斗羅三台
維皇建極明堂大
開縣爵待士四方
風來羨君

前年取高第名掛天曹粲星麗歸寧不見倚門人淚盡
呼天血斯繼三年讀禮心惇惇祥禫相循喪服更素琴
鼓罷笙歌成仰望青天東北征洞庭嫋嫋涼風生秋水
芙蓉滿陂澤日色照耀千花明大扁小艇相逐行雙櫓
夾舷鵝鸛鳴持觴挹酒勸君飲去留各含無限情無限
情長悠悠人生豈為離別愁丈夫得意有如此仗劍出
門何所求賈生痛哭更流涕憂在國事非身謀君今此
行給史可立致遇事盡言斯職修毋令吾徒戚戚長抱

江湖憂

貞女行送汝其通

貞女昔未字脉脉處深閨容顏美如玉中門未嘗窺
軋機杼聲朝斯復夕斯所志在女紅辛苦安得辭媒氏
豈不營所適匪其宜衆口徒囂囂矢心終不移冉冉歲
云暮芳馨愈菲菲君子慕高誼寤寐以求之幣交既成
禮桃夭良及時諸娣如雲從百兩送于歸川澤靡韓土
孔樂乃王畿令居且燕譽永久以為期

殺虎行

城西之山舊無虎草淺林疎少依阻白日咆哮忽見之
橫行食人難指數官兵捕虎爭負戈上下陵谷交張羅
一虎跳梁悉驚潰何況衆口騰其多怒視耿耿猶負嵎
山民櫻之椿以艾黃斑紛披血膏野相與屠戮殘其軀
嗚呼養兵資禦侮見虎何為怯無武龍沙茫茫天四垂
走馬胡兒猛於虎君不見肉食軒乘將門子遇敵幾人
能致死

鳳求凰送張教諭子還鄉娶親

孤鳳何翩翩四海求其凰誰知無所遇翱翔歸故鄉故
鄉南海上梧桐產高崗醴泉出其下竹實生其旁鳳飛
且栖息五色成文章相從效于飛和鳴為朝陽音聲何
噉噉恍若調宮商豈惟偕老願瑞世昭文明

叶

鴻瀟吟送余大尹

鴻瀟何雙雙飛來水中央使君入臺去官為繡衣郎黃
金為馬鞍青絲為馬韉馳驅道路上到處生輝光

鸞鸞何雙雙飛來水中渚傾城送使君使君入臺去旁
人盡相羨吾儂泣無語使君挽不留烏啼天欲曙

鸞鸞何雙雙飛來水中洲使君入臺去翩翩天上遊鳳
凰覽德輝一鳴三千秋下以成文章上以昭皇休

雙鳳吟送吳汝礪汝器兄弟秋闈

翩翩雙彩鳳和鳴復齊飛齊飛何所止西北有高臺叶
高臺高無極上與青雲齊竹實為鳳食梧桐為鳳栖映
日弄光景翥風揚羽儀音聲調律呂文彩耀陸離幸逢

命夔日佐以雲和師笙磬既同音簫韶亦間吹聞聲自
相感應節舞徘徊叶上昭帝王瑞下彰畿甸輝信蒙主
司愛遂命虞人羅叶持為大廷貢張樂迎來茲聞有鳳
凰閣復有鳳凰池翔遊永朝夕人間徒爾思

行臺燕別歌

行臺老栢枝相糾羣鳥暮集聲啾啾臺端吏散晚衙畢
相送使君天上遊初筵濟濟月未出滿堂笙鏞間琴瑟
流光迸彩天際來上下通明若朝日金盤玉案相疊高

黃盃白朐凝乳膏衆中持杯捷先得哄堂大笑聲
齟齬興來投壺明月下有行其觴慶多馬宵寒不入玄狐裘
微霜淒淒在鴛瓦分曹探韻題新詩波濤入筆爭雄奇
扶搖擊水海神泣大鵬怒翼雲天垂酒酣樂極成悲
訶訶聲感人哀怨多今夕共樽酒明朝各山河一去與一
留倏忽如飛梭行勞居逸寧不顧我言此理良無他使
無行者職乃闕使無居者民如何民如何仰公輩廟堂
與江湖到處咸有待從今變理及旬宣總是臺中舊寮

案



西村集卷一